

Шаджна ѳмнӑс пропаганд чанъгъахмн

Мана орн-нутгт социализм диилӑд, экономикд болн социальн бӑӑдлд унъгарн сольгдсн хуврлт гарснала хамдан, советск улсин серл-медрлнь хуврв, ухан-седклнь, хӑлӑцнь онъгдарв. Советск улсин коммунистическ медрлнь, эднӑ ѳдӑн ухан-серлин кирцӑгъинь, ѳдр болгън кедж йовх кӑдлмшнь ўзўлджӑнӑ.

Болв ӑмтнӑ зӑрм ӑнъгс дунд хуучна цагин бӑрц, авъяс, хӑлӑц ўлдснь ода чигн бийӑн ме-дўлнӑ. Нег ўлў бурхн-шаджнд шўтлгън ўзгднӑ. Иим йовдл — коммунистическ тосхлтд, советск улст марксистск-ленинск сургъмдж ѳглгънд ик харшта болдгнь лавта ил болджана.

Келгдснӑс иштӑгъӑр хӑлӑ-хлӑ, Каспийск района партийн болн общественн организацсин, шаджна ѳмнӑс пропаганд делгрўллгънднь ик дуту-дунд бӑӑхнь ўзгдджӑнӑ. Тегӑд чигн «Каспиец» болн «Вторая пятилетка» колхозмудин зӑрм колхозникуд хуучна сӑн ѳдрмўдт кӑдлмшт гарцхахш, Каспийск селӑнӑ багъчудин зӑрмснь болхла иим ѳдрмўдт клубд, умшлгъна герт, библиотекд ирцхӑхш.

Шаджна ѳмнӑс пропаганд кедгънд политическ болн научн медрл тархалгъна общественн района отделенӑ члед шунмгъагъӑр орлцх зӑвтӑ, эдн лекцс, докладмуд кўч-кӑлсчирт умшддж ѳгӑд, бурхн-шаджна харшлтинь цӑӑлгъсн ик чинртӑ

болджана. Болв общественн от-деленӑ кеджӑх кӑдлмшнь ик тату. Обществин зӑрм чледнь шаджна ѳмнӑс пропаганд делгрўллгънд тӑрўц орлцхш. Эдн дунд ўўрмўд А. Кожевниковиг, М. Артамановиг, Х. Гаряевиг заах кергтӑ. Эдн общественн член болдж ик удан цагт бӑӑх улс. Тер бийнь шаджна ѳмнӑс пропаганд келгъӑр неджӑд чигн лекц умшад уга.

Онц-онц эклц партийн организацс шаджна ѳмнӑс кеддг пропагандт онъг т ӑ в х ш. Прикаспийск загъсна комбинатд (эклц парторганизацин сеглӑтрнь ўр Мамышев) 1958 джилин туршарт тер тӑрӑр нег чигн лекц умшгдсн уга. Иим йовдл Прикаспийск МРС-д, «Оленичевский» совхозд, «Каспиец» колхозд чигн ўзгднӑ.

Шаджна ѳмнӑс пропаганд нигдж сулдхлгън ик хаджгър йовдл. Районд эн кӑдлмшини ѳргӑр делгрўлдж болх аргъчидл бӑӑнӑ. Эклц партийн организацс цуг политическ кӑдлмштӑн онц онъган шаджна ѳмнӑс пропаганд делгрўллгънд ѳгч кецхӑх зӑвтӑ. Энўндӑн, шаджна ѳмнӑс пропагандшунмгъа, зӑргтӑ кевӑр кедгхмн гидж партин ѳдг заавриг мар-тхмн биш.

Н. ПАРШИНА.